

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৫৩/২০১৭-১৮

ঢাকা, মঙ্গলবার ১৯ সেপ্টেম্বর ২০১৭, ৪ আশ্বিন ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। যুক্তরাষ্ট্রের প্রেসিডেন্ট আয়োজিত জাতিসংঘের সংস্কার বিষয়ের সভায় প্রধানমন্ত্রীর যোগদান
- ২। রোহিঙ্গা সংকটে বাংলাদেশের পাশে থাকবে ভারত
বিমানেই প্রধানমন্ত্রীকে ভারতীয় পররাষ্ট্রমন্ত্রীর বার্তা
- ৩। রোহিঙ্গা ইস্যুতে বিশ্ব জনমত সৃষ্টিতে দক্ষিণ কোরিয়ার সহায়তা চাইলেন স্বাস্থ্যমন্ত্রী
- ৪। রোহিঙ্গা ইস্যুতে রাজনীতি নয় : সড়ক পরিবহণ ও সেতুমন্ত্রী
রোহিঙ্গাদের জন্য খোলা হয়েছে ৮ লজরখানা
- ৫। মানবিক কারণে প্রধানমন্ত্রী রোহিঙ্গাদের পাশে দাঁড়িয়েছেন
পিআইডিতে সংবাদ সম্মেলনে তথ্যমন্ত্রী
- ৬। রোহিঙ্গা ইস্যুতে বাংলাদেশের পাশে থাকবে যুক্তরাজ্য : রুশনারা আলী
- ৭। রোহিঙ্গাদের জন্য বিদেশ থেকে আসা ত্রাণের কর মওকুফ করেছে এনবিআর
- ৮। সরকার গ্যাস নিয়ে ব্যবসা করবে না : জ্বালানি প্রতিমন্ত্রী
- ৯। চালের কৃত্রিম সংকট সৃষ্টি করলে ব্যবস্থা : আইজিপি
- ১০। সরকারি হলো আরও ১২টি স্কুল ও কলেজ
- ১১। বঙ্গখাতে প্রণোদনা সুবিধা বাড়ল : বাংলাদেশ ব্যাংকের প্রজ্ঞাপন

১। যুক্তরাষ্ট্রের প্রেসিডেন্ট আয়োজিত জাতিসংঘের সংস্কার বিষয়ের সভায় প্রধানমন্ত্রীর যোগদান

প্রধানমন্ত্রী শেখ হাসিনা জাতিসংঘের সংস্কারে যুক্তরাষ্ট্রের প্রেসিডেন্ট ডোনাল্ড ট্রাম্প আয়োজিত উচ্চপর্যায়ের এক সভায় অংশ নিয়েছেন। গতকাল (১৮ সেপ্টেম্বর সোমবার) জাতিসংঘ সদরদপ্তর আয়োজিত এ সভায় ১৯৩টি দেশের রাষ্ট্র ও সরকারপ্রধানরা যোগ দেন। সভাস্থলে প্রধানমন্ত্রী শেখ হাসিনাকে স্বাগত জানান ডোনাল্ড ট্রাম্প। এ সময় তাঁরা কুশল বিনিময় করেন। সভার আলোচ্য বিষয়ের শিরোনাম ছিল ‘জাতিসংঘের সংস্কার : ব্যবস্থাপনা, নিরাপত্তা ও উন্নয়ন।’ জাতিসংঘের বৃহত্তর দক্ষতা, জবাবদিহিতা ও স্বচ্ছতা আনয়নে মহাসচিব আন্তোনিও গুতেরেসের একটি ঘোষণা গ্রহণের প্রচেষ্টাকালে এ সভা অনুষ্ঠিত হলো। গতকাল সকাল পর্যন্ত এ ঘোষণায় ১২৮টি দেশ স্বাক্ষর করেছে। সূত্র-সমকাল (পৃ.১,ক.১), জনকণ্ঠ (পৃ.১,ক.৪), ইন্ডিপেনডেন্ট (পৃ.১,ক.৭), ডেইলি স্টার (পৃ.১,ক.১)। ইত্তেফাক, সমকাল, যুগান্তর, ভোরের কাগজ, ডেইলি স্টার, ডেইলি সান এ বিষয়ে ছবিসহ খবর ছেপেছে। জনকণ্ঠ, ইনকিলাব, সংবাদ, ইন্ডিপেনডেন্ট, ডেইলি সান, ডেইলি স্টার, নিউজ টুডেসসহ অধিকাংশ পত্রিকা প্রধানমন্ত্রীকে সংবর্ধনা প্রদানের ছবি ছেপেছে।

২। রোহিঙ্গা সংকটে বাংলাদেশের পাশে থাকবে ভারত

বিমানেই প্রধানমন্ত্রীকে ভারতীয় পররাষ্ট্রমন্ত্রীর বার্তা

রোহিঙ্গা ইস্যুতে অবস্থান পরিবর্তন করেছে ভারত। প্রতিবেশি এ দেশটি এখন রোহিঙ্গা সংকটে বাংলাদেশের পাশে থাকবে দিল্লির এ বার্তা প্রধানমন্ত্রী শেখ হাসিনাকে জানিয়েছেন ভারতের পররাষ্ট্রমন্ত্রী সুষমা স্বরাজ। দু’দিন আগে টেলিফোনেই কিছুটা ইঙ্গিত দিয়েছিলেন তিনি। এবার দু’জন একই ফ্লাইটে আটলান্টিক পাড়ি দেওয়ার সময়ে সেই আলোচনাই হয়েছে। ঢাকা, নিউইয়র্ক, আবুধাবি ও দিল্লির কূটনৈতিক সূত্র একথা নিশ্চিত করেছে। এর পরিপ্রেক্ষিতে ভারতের পররাষ্ট্রমন্ত্রী সুষমা স্বরাজ গত ১৪ সেপ্টেম্বর বৃহস্পতিবার টেলিফোন করে প্রধানমন্ত্রী শেখ হাসিনাকে দিল্লির অবস্থান পরিবর্তনের কথা জানান। তিনি টেলিফোনে প্রধানমন্ত্রী শেখ হাসিনাকে জানান যে, রোহিঙ্গা ইস্যুতে বাংলাদেশের অবস্থানেই বিশ্বাস করে ভারত। ভবিষ্যতে মায়ানমারের সঙ্গে দ্বিপক্ষীয় আলোচনায় বাংলাদেশ থেকে রোহিঙ্গাদের ফিরিয়ে নিতে বলবে ভারত। এছাড়াও বহুপক্ষীয় এবং গোপনীয় বৈঠকেও রোহিঙ্গাদের মায়ানমারে ফেরত পাঠানোর কথা বলবে ভারত। সূত্র-যুগান্তর (পৃ.১,ক.৬)।

৩। রোহিঙ্গা ইস্যুতে বিশ্ব জনমত সৃষ্টিতে দক্ষিণ কোরিয়ার সহায়তা চাইলেন স্বাস্থ্যমন্ত্রী

স্বাস্থ্য ও পরিবার কল্যাণ মন্ত্রী মোহাম্মদ নাসিম মায়ানমারে রোহিঙ্গাদের ওপর চলমান গণহত্যা বন্ধের লক্ষ্যে বিশ্বজনমত সৃষ্টিতে দক্ষিণ কোরিয়ার সহায়তা চাইলেন। গতকাল (১৮ সেপ্টেম্বর সোমবার) সচিবালয়ে স্বাস্থ্যমন্ত্রীর সঙ্গে দক্ষিণ কোরিয়ার রাষ্ট্রদূত অ্যান সিওং দো সাক্ষাৎ করতে গেলে তিনি এ সহায়তা কামনা করে বলেন, মায়ানমার সেনাবাহিনী রোহিঙ্গা বিতাড়িত করার যে পদক্ষেপ নিয়েছে, তা নিন্দনীয় এবং অবিলম্বে তা বন্ধ করতে হবে। এজন্য বিশ্ব নেতৃবৃন্দকে মায়ানমার সরকারের ওপর চাপ বাড়ানোর তাগিদ দেন তিনি। সূত্র-ইত্তেফাক (শেষ পৃ.,ক.৫), জনকণ্ঠ (শেষ পৃ.,ক.৪), ফিনানশিয়াল এক্সপ্রেস (পৃ.৩,ক.৮)।

৪। রোহিঙ্গা ইস্যুতে রাজনীতি নয় : সড়ক পরিবহণ ও সেতুমন্ত্রী

রোহিঙ্গাদের জন্য খোলা হয়েছে ৮ লঙ্গরখানা

সড়ক পরিবহণ ও সেতুমন্ত্রী ওবায়দুল কাদের বলেছেন, রোহিঙ্গা ইস্যু নিয়ে যাতে কেউ রাজনীতি করতে না পারে সেদিকে সবাইকে সতর্ক থাকতে হবে। গতকাল (১৮ সেপ্টেম্বর সোমবার) কক্সবাজারের উখিয়ায় রোহিঙ্গাদের ত্রাণবাহী যানবাহন চলাচল সহজতর করতে শহিদ এটিএম জাফর আলম আরাকান সড়কের কুতুপালং থেকে উখিয়া পর্যন্ত সড়ক প্রশস্তকরণ কাজের উদ্বোধনকালে তিনি এ কথা বলেন। তিনি বলেন, বাংলাদেশ কূটনৈতিক পর্যায়ে রোহিঙ্গা সমস্যা সমাধানে কাজ করছে। মন্ত্রী ওবায়দুল কাদের রোহিঙ্গাদের মধ্যে খাবার সরবরাহে ৮টি লঙ্গরখানা খোলা হয়েছে জানিয়ে সাংবাদিকদের বলেন, রোহিঙ্গাদের পাশে আছে সরকার। পরে

মন্ত্রী কুতুপালংয়ে সরকারিভাবে পরিচালিত মেডিকেল ক্যাম্প পরিদর্শন করেন। সূত্র-জনকণ্ঠ (পৃ.১,ক.৮), ইনকিলাব (শেষ পৃ.,ক.২), সমকাল (পৃ.২,ক.৬)।

৫। মানবিক কারণে প্রধানমন্ত্রী রোহিঙ্গাদের পাশে দাঁড়িয়েছেন : পিআইডিতে সংবাদ সম্মেলনে তথ্যমন্ত্রী

তথ্যমন্ত্রী হাসানুল হক ইনু বলেছেন, রাজনীতি নয়, মনুষ্যত্বকে অগ্রাধিকার দিয়ে প্রধানমন্ত্রী শেখ হাসিনা রোহিঙ্গা উদ্বাস্তুদের পাশে দাঁড়িয়েছেন। বিশ্ব আজ তাঁর পাশে এসে দাঁড়িয়েছে। গতকাল (১৮ সেপ্টেম্বর সোমবার) সচিবালয়ে তথ্য অধিদফতরের সম্মেলনক্ষেত্রে রোহিঙ্গা পরিস্থিতি নিয়ে সংবাদ সম্মেলনে তিনি এসব কথা বলেন। তথ্যমন্ত্রী বলেন, রোহিঙ্গা সমস্যা সমাধানে বাংলাদেশ সরকার সামরিক নয়, কূটনৈতিক তৎপরতায় বিশ্বাসী। মায়ানমারের সামরিক উত্তেজনা সৃষ্টির উসকানি রোধ করার পক্ষেও তিনি মত দেন। সূত্র-ইত্তেফাক (পৃ.১,ক.১), সংবাদ (পৃ.১,ক.৫) ডেইলি স্টার (পৃ.৩,ক.৬), নিউ নেশন (পৃ.৩,ক.৬)।

৬। রোহিঙ্গা ইস্যুতে বাংলাদেশের পাশে থাকবে যুক্তরাজ্য : রুশনারা আলী

মায়ানমার থেকে পালিয়ে আসা রোহিঙ্গাদের বর্তমানে বাংলাদেশের জন্য অন্যতম চ্যালেঞ্জ বলে মন্তব্য করেছেন সফররত ব্রিটিশ প্রধানমন্ত্রীর বাংলাদেশ বিষয়ক বাণিজ্যদূত রুশনারা আলী। তবে আশ্রয় ও খাবার দেওয়ার মাধ্যমে রোহিঙ্গাদের পাশে দাঁড়িয়ে বাংলাদেশ ঐতিহাসিক ভূমিকা পালন করছে বলে মনে করেন তিনি। বাংলাদেশের এ উদ্যোগে যুক্তরাজ্য পাশে থাকবে বলেও জানিয়েছেন ব্রিটিশ পার্লামেন্টের বাংলাদেশি বংশোদ্ভূত এ সদস্য। গতকাল (১৮ সেপ্টেম্বর সোমবার) সচিবালয়ে বাণিজ্যমন্ত্রী তোফায়েল আহমেদ এর সঙ্গে এক বৈঠকে এসব মন্তব্য করেন রুশনারা আলী। যুক্তরাজ্যের উচ্চপর্যায়ের বাণিজ্য প্রতিনিধিদলের নেতৃত্ব দিচ্ছেন তিনি। সূত্র-সমকাল (পৃ.২,ক.৭), জনকণ্ঠ (পৃ.১,ক.৮), নিউ এজ (শেষ পৃ.,ক.১)।

৭। রোহিঙ্গাদের জন্য বিদেশ থেকে আসা ত্রাণের কর মওকুফ করেছে এনবিআর

বাংলাদেশে আশ্রয় নেওয়া রোহিঙ্গাদের জন্য বিশ্বের বিভিন্ন দেশ থেকে আসা ত্রাণসামগ্রীর ওপর সব ধরনের শুল্ককর মওকুফ করেছে সরকার। এনবিআর বলেছে, যেসব দেশ ও সংস্থা নির্যাতিত রোহিঙ্গাদের সহায়তায় ত্রাণসামগ্রী সরবরাহ করবে, তাদের কোনো ধরনের শুল্ককর দিতে হবে না। মানবিক দৃষ্টিকোণ থেকে এ সিদ্ধান্ত নিয়েছে সরকার। এনবিআর সূত্রে জানা গেছে, আগে বিদেশ থেকে আনা ত্রাণসামগ্রীর ক্ষেত্রে নির্ধারিত শুল্ক ও ভ্যাট অব্যাহতি ছিল। এখন তার সঙ্গে অগ্রিম আয়করও প্রত্যাহার করা হলো। ফলে ত্রাণসামগ্রীতে সম্পূর্ণ কর অব্যাহতি সুবিধা দেওয়া হয়েছে। এ আদেশ জারি করার পরপরই গতকাল (১৮ সেপ্টেম্বর সোমবার) সংশ্লিষ্ট কমিশনারেটগুলোকে এ বিষয়ে নির্দেশনা দিয়ে চিঠি পাঠিয়েছে এনবিআর। সূত্র-সমকাল (পৃ.৫,ক.২), ইত্তেফাক (পৃ.১৮,ক.৬), অবজারভার (পৃ.১,ক.৭)।

৮। সরকার গ্যাস নিয়ে ব্যবসা করবে না : জ্বালানি প্রতিমন্ত্রী

বিদ্যুৎ, জ্বালানি ও খনিজসম্পদ প্রতিমন্ত্রী নসরুল হামিদ বলেছেন, এলএনজির ব্যবহার ও মূল্য নির্ধারণে দীর্ঘমেয়াদি ও সুনির্দিষ্ট পরিকল্পনা থাকা প্রয়োজন। সরকার এলএনজি বা গ্যাস নিয়ে ব্যবসা করবে না। সব মিলিয়ে টেকসই মূল্য ব্যবস্থাপনা থাকলে ব্যবসায়ীদের পরিকল্পনা স্থির করতে সহজ হবে। গতকাল (১৮ সেপ্টেম্বর সোমবার) রাজধানীতে পেট্রোসেন্টারে এক মতবিনিময় সভায় তিনি এ কথা বলেন। এলএনজি আমদানি পরবর্তীতে অগ্রাধিকার ভিত্তিতে শিল্পবাণিজ্যিক প্রতিষ্ঠানে গ্যাস সরবরাহের কর্মপরিকল্পনা প্রণয়নের লক্ষ্যে এ সভা আয়োজন করা হয়। সূত্র-ইত্তেফাক (পৃ.৩,ক.৫), সমকাল (পৃ.৩,ক.৬), ডেইলি সান (পৃ.১,ক.১), ফিনানশিয়াল এক্সপ্রেস (পৃ.১,ক.৭)।

৯। চালের কৃত্রিম সংকট সৃষ্টি করলে ব্যবস্থা : আইজিপি

বাজারে কৃত্রিম সংকট সৃষ্টি করতে কেউ চাল মজুত করলে তার বিরুদ্ধে ব্যবস্থা নেওয়ার নির্দেশ দেওয়া আছে বলে জানিয়েছেন পুলিশ প্রধান একেএম শহীদুল হক। গতকাল (১৮ সেপ্টেম্বর সোমবার) ঢাকায় পুলিশ সদরদফতরে আইনশৃঙ্খলা বিষয়ক এক সংবাদ সম্মেলনে সাংবাদিকদের প্রশ্নের জবাবে তিনি মজুতদারদের বিরুদ্ধে এই ইঁশিয়ারি দেন। সূত্র-সংবাদ (পৃ.১,ক.৮), যুগান্তর (পৃ.৩,ক.৬), ডেইলি সান (পৃ.১,ক.৬), বাংলাদেশ টুডে (পৃ.১,ক.৫)।

১০। সরকারি হলো আরও ১২টি স্কুল ও কলেজ

দেশের আরও ১২টি স্কুল ও কলেজ সরকারি করা হয়েছে। গতকাল (১৮ সেপ্টেম্বর সোমবার) এ সংক্রান্ত প্রজ্ঞাপন জারি করেছে শিক্ষা মন্ত্রণালয়। উন্নতমানের শিক্ষার ব্যবস্থা করার জন্য সরকার এসব প্রতিষ্ঠান গড়েছিল। সরকার গড়ে তুললেও এগুলো নিজের আয়ে চলছিল। এ কারণে শিক্ষার ব্যয় বেড়ে যায়। ফলে স্থানীয়দের কাছে অনেকটাই উপেক্ষিত ছিল এসব প্রতিষ্ঠান। এমন পরিস্থিতিতে স্কুল ও কলেজগুলো পরিচালনা দুরূহ হয়ে পড়ে। এ কারণে প্রতিষ্ঠানগুলো সরকারি করা হয় বলে জানা গেছে। সূত্র-যুগান্তর (পৃ.১৭,ক.৫), ভোরের কাগজ (শেষ পৃ.,ক.১)।

১১। বস্ত্রখাতে প্রণোদনা সুবিধা বাড়ল : বাংলাদেশ ব্যাংকের প্রজ্ঞাপন

বস্ত্রখাতের কম্পোজিট (যারা একইসঙ্গে ফেব্রিকস ও পোশাক তৈরি করেন) মিলের রফতানিকারকরা নিজস্ব প্রতিষ্ঠান ছাড়া অন্য প্রতিষ্ঠান থেকে বস্ত্র তৈরি করলেও এখন থেকে নগদ সহায়তা পাবেন। আগে শুধু নিজস্ব প্রতিষ্ঠানে বস্ত্র তৈরি করলে তারা এ সহায়তা পেতেন। গতকাল (১৮ সেপ্টেম্বর সোমবার) এ সংক্রান্ত একটি প্রজ্ঞাপন জারি করেছে বাংলাদেশ ব্যাংক। সূত্র-যুগান্তর (শেষ পৃ.,ক.১), নিউ নেশন বিজনেস পাতা (পৃ.১,ক.২), নিউ এজ বিজনেস পাতা (পৃ.১,ক.২)।

সম্পাদকীয়

- ক. **ইন্ডেফাক** : অর্থনৈতিক অগ্রগতির সাথে কর্মপরিবেশের উন্নয়ন ও শ্রমিকদের নিরাপত্তা নিশ্চিত করা উন্নয়নকে টেকসই করার পূর্বশর্ত হওয়ায় কর্মক্ষেত্রে নিরাপত্তা নিশ্চিত করার ওপর গুরুত্বারোপ।
- খ. **সংবাদ** : রাজধানীর প্রতিটি বাড়িতে যাতে সেপটিক ট্যাংক থাকে সে ব্যাপারে নজরদারির সুপারিশ।
- গ. **ভোরের কাগজ** : ওএমএসের বিক্রিত চালে সিদ্ধ চালের পরিবর্তে আতপ চাল দেওয়ার অভিযোগ ওঠার কথা উল্লেখ করে ভোক্তাদের কাছে মানসম্মত চাল বিক্রির সুপারিশ।
- ঘ. **যুগান্তর** : আজ থেকে শুরু হওয়া জাতিসংঘ সাধারণ পরিষদের ৭২তম অধিবেশনে অংশ নিয়েছেন প্রধানমন্ত্রী শেখ হাসিনা উল্লেখ করে রোহিঙ্গা সংকটের সমাধানের ব্যাপারে বিশ্বনেতারা কার্যকর আলোচনা করবেন বলে প্রত্যাশা ব্যক্ত।
- ঙ. **যায়যায়দিন** : ঢাকা সিটি করপোরেশন বিভক্ত হওয়ার ছয় বছর পার হলেও এখনো নতুন জনবল কাঠামো তৈরি করতে না পারায় জনবল সংকটে ভুগছে উল্লেখ করে এ ব্যাপারে প্রয়োজনীয় উদ্যোগ নেওয়ার ওপর গুরুত্বারোপ।
- চ. **নিউ এজ** : সরকারি-বেসরকারি খাতে জনগণের জন্য স্বাস্থ্যসেবা বাড়ানোর ওপর গুরুত্বারোপ।
- ছ. **এশিয়ান এজ** : দ্বিতীয় সাবমেরিন ক্যাবল চালু হওয়ায় ডিজিটাল বাংলাদেশ হওয়ার পথে দেশ আরও একধাপ এগিয়েছে বলে মন্তব্য করে সম্পাদকীয় প্রকাশ।

উপসম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, রোহিঙ্গাদের ফিরিয়ে নিতে মায়ানমারের ওপর আন্তর্জাতিক চাপ সৃষ্টি করার লক্ষ্যে বাংলাদেশকে আরো তৎপর হতে হবে।

নিবন্ধ ও ফিচার

ইন্ডেফাক পত্রিকায় প্রকাশিত ‘বাড়তে হবে দেশি পণ্যের মান’ শিরোনামের নিবন্ধে অভিমত প্রকাশ করা হয়েছে, প্রশিক্ষিত কারিগর দ্বারা বাংলাদেশে আন্তর্জাতিক মানের পণ্য উৎপাদিত হলে দেশে বিদেশি পণ্যের চাহিদা কমে আসবে, আন্তর্জাতিক বাজারে দেশি পণ্যের কদর বাড়বে।

#

ফাহিমা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা

